

# Taaitazai

## Taaitazarina Poli

### Pikariyikwia' Yidavakesi.

---

**1** <sup>1</sup>Taaitazai, Polinyi pikarya da' yida'manigeinyi. Gotiyare yaasiwa'wawinyainyi, Jizaazai Kiraazitiyai Nyidaasadeinyi Apozeliyaiyi mwaaihe. Gotiyai yune gaminne dahilakake a'mwera kwalaalyara Kiraazitiyai limwagya'neraavina nyimaryaasadeinyi. Nabaai Gotiyarebwi midibi'devina yagaala nebulya' yawiramaarya'nevinaji gaimwanga ya'neinyi nyimaryaasadeinyi. <sup>2</sup>Yuyagaa' yuyagaa'ne gaalyabwina sahvara yilaaya yadivi' yemwaaibi'de'na wigaimwadinyainyi. Sinnawi kigaakuna Gotiyai Kwaakeva' mwakyaakegaa' gaala daza' neminyi wijaaya'na yune naanga nebulya'na mena wijaakelyi. Sai kwaasiya dadei mi'. Sa' yanga nejaavadelyi. <sup>3</sup>Nabaai divi, dazagaa' gami sai dahilakajahaa' gaala dazavine yagaalya' ku'maayaba yima'naabakesi. Yi yagaala sa' a'mwera wijiwaakya'neraavi widakesi. Sahwai neminyine padaihasamaasai Gotiyai kiwinya dakaka yagaala sa' limwagarawijiwaakya'neinyina nyijaavadelyi. <sup>4</sup>Taaitazaigi, giminyi kagiziwaake nimi Naangeri limwagarebaaibi' gimi limwagaragi. Sare' nimore kaimiraaya tewaanyaigi yima'nagi. Yi sasareiginyi Gotiyai Nenimaangelyi Kiraazitiyai Jizaazai nemire nevadaihasamaa'delyi yanga gaimwange'na gyakilyi giminyi kwaamu'nanyabwi tewaanya gwakika!

#### Ahu'manna Kiriti Taaitazare wawinyavinesi.

<sup>5</sup>Ahu'manna Kiriti kuna mwaaidinyaiginyi gyahalya'maveiginyi “Wawinya pini nimi myengi ja! Nabaai anga gazabazaba Naangeri limwadivisaraavi maremwaala'ne a'mwe naanga pwaraavi dakya!” dena sinnawi githevaabi' jitheiginyi. <sup>6</sup>Dara githe. A'mwe pwai a'mweraavire tinnyari yiwetawakya pini myaderi wangana'gizi sai a'mwe yune gave piri'nanyari nabaai gamire kaimiraaya kimilikaji Kiraazitiyai

limwaga'divisamilikaavi, kayaa'nanya sabwi ya'na yagaala pini maayamilikaavi, kuvinimaangeyuraavi galazekivala myadivisamilikaavi, yi a'mwe sasare dazari maremwaala'neri dithahilakideiginyi. <sup>7</sup>Sare' darevinyi. Gotiyare wawinyavi maremwaala ya'ne mwaalikabaaibi' Naangereraavi maremwaaidei nayaa yida'na yamaryadelyi. Sara yadaawori a'mwera yiwetawakya piri' kirivi mabiramaari yipi'delyi. Sarei mwaalana! Sai pihadika mi yadelyi. Sai sinna tika yarai mudayi yadelyi. Sai biyaaya nada yimaka widei mi'. Sarei mwaalana! Sai a'mweraavi mala yaasiwa'na maramamaryadelyi. Sai nigwia gilyivita kwalaalyanna tiganaarya myadelyi. <sup>8</sup>Aawa. Sai a'mwe anga pibadaa'nyi angyiri'maakaanya bipijaraavi maa'da nayaa maremwaaidelyi. Sai yuya tewaanya nawi'nya sabwina yada simunya yune nawi'nyaburina midinadelyi. Sai nayaa yida'na nebwinna mwaaida Gotiyare yuya sabwi midinadelyi. Girika maayalyi. Sai nabaai gannya sabwina nayaa maremwaainadelyi. <sup>9</sup>Sai yagaala nebula tewaanya' gaminyi wijiwaakinike' nayaa diraginna limwaga'delyi. Gotiyai "Sai a'mweraavi wijiwaakya yagaala maamidaryavina yivaimwagannei mwaalana! Sara yada a'mwe yagaalya galazekivaidivisaraavi diraginna yiniga widannei mwaalana!" kada' yagaala sa' limwaga'delyi.

**Kiriti saba a'mwe kwaasiya kwalaalyara mwaahasaraavinesi.**

<sup>10</sup>Sare' darevinyi. A'mwe kwalaalyara yagaala tewaamaraange galazekivaidivisara mwaaiha'. Sahwara yagaala yaasiwa'na dadivi' a'mweraavire simunyangina kwaasi widadivisare. A'mwe kwalaalya sasarerera "Kilaaka gurya ditha'nyila!" dadivisare Juyara. <sup>11</sup>A'mwe sasarerera "A'mweraavire nigwia mwagi'nya'neina sasarebura wijiwiryana!" yawi'divisara nemi myaanne sabwina nigwia wagila wijaaya'nenna wijiwiryadivisare. Sasare sabwi pwaraavire simunyangi mwagi'nadaapi jilikaimiraaya yuyangire kwaamu'nanyabwi yiwina yivanikere. A'mwe sasare saraavire maangengi bipaibika! <sup>12</sup>Ahu'manna Kiriti mwaaida'giziyaba mwaalyai dazahibadaa'nyai sidu'naka akwai sinnawi kigaa' gamireraavina dara dina "A'mwe Ahu'manna Kiriti mwaalyara yuyagaa' kwaasiyabwina dadivisarera. Malakayaawarya kayaa'nanyare. Sahwara tika kwalaalya nadivi' wana maa'na widere." <sup>13</sup>Jalikirakya daza' nebulyasi. Sarevidaa'nyi "Kumire diraginna limwangeburi maamidaryara mwaai'bika!" da'gizi sahwaravire maanga diraginna duthana! <sup>14</sup>Nabaai sahwaravire wajingyagaalyaji a'mwe yagaala nebulya' bule'na wijaavadivisaraavire yagaai'kiwinya dala pininna pininnanyaji kadiki' wakamaremwaala nyipika! <sup>15</sup>A'mwe Gotiyai simunyavi nawi'nyabwi yavada'galawakakera nawi'nyabwi kininnakeraavina yuya sa tewaanya girika maayangy. Kiri' nabaai a'mweraavire simunyangi simunya girikita'nanyabwi kininnakera "Kiraazitiyai yuya sa kimaakiya

dakinikebwi wasi'nakebuliyi,” myawiralimwagyadivisaraavina tewaanya aane pini kini mi. Aawa. Kumire simunyasi simunya padaihirakyalyi yuyawaai yuna girikita'nanyawaalyi. <sup>16</sup>Kumire maangengidaa'nyi ku'maayaba dara dadivisare “Nimi Gotiyarina yawi'dinyainyira.” Kiri' kumire yamaryabwina Gotiyarina bule'na wijaavadivisare. Sare sabwina Gotiyari yuna maa'na wima'nadelyi. A'mwe yagaala nawi'nya' galazekivaidivisare. Nabaai wawinya tewaanya ya yuya ya'nera yiniga wi'na yipinera mi'. Gotiyai sahwarraavi yawiramaaradera mi'.

### Ge geraavine wijiwirya nawi'nyaburinesi.

**2** <sup>1</sup>Kiri' gimi saigi gimire wijiwaakya maamidarya sasi yiniga wi'na yadevwina a'mweraavi nayaa duthana! <sup>2</sup>Yi neraavi nayaa dara duthana! “A'mwe neihi waainiya nadivi' yimaka muibinera!” Sahwara tewaanya yida'maraangebawina simunya nayaa yawi'divi' kumire simunya nayaa maremwaabika! Kiraazitiyari diraginna limwangeburi maamidaryara pada'galemwaabika! Pwaraavina tewaanya wivu'nyaburiji taanginya yuyangine'na diraginna daayaburiji tewaanya pada'galemwaabika! <sup>3</sup>Sabaabi' a'mwe ne kimilikaji tewaanna nawi'nya pada'gainyina yamaripika! Bulayagaalyaji nadipidika! Kumire simunyangi aalya waainiya diraginya' numaremwaaladika! Tewaanyabura wijiwiripika! <sup>4</sup>“A'mwe miginyikibawemilikaavi tewaanyabwina yibwaridaakupika!” dena githiwa. Dare yabwina nayaa wijiwiripi'demilike. Kunnya a'mweraavina kunnya kaimiraaya kininginaji tewaanya wivu'nyina wiade'na. <sup>5</sup>Nabaai kunnya simunyariji nayaa maremwaainyina yadivi' girika maaya nebwina mwaabi'demilike. Sara yadivi' nabaai kunnya angengiji tewaanna maremwaaina yipi'demilike. Sara yapi a'mweraaviji kunnya kaimiraayangiji nayaa pada'galagaimwanna yipi'demilike. Saremilika kunnya a'mweraavi dalaangewi mwaabi'demilike. “Nemirebwina a'mwera Gotiyare yagaalya'na biraiyagaala nadipidika!” dadivi' a'mwe tewaanyamilika sara mwaabi'demilike.

<sup>6</sup>Sasare'bi' a'mwe miginyikibaweraavi dihaa'bwata jitheiginyi. Nabaai sare kwaraji kumire simunya nayaa maremwaainipi'dere. <sup>7</sup>Gimi tewaanya yija yuya sabwi gimi saigi ke'ba'nanyaigi dimwaaideiginyi. A'mwera gimi tewaanya yijaiginyi gimididivi' dala piwwinanya tewaanyabwina yipi'dere. A'mweraavi wijiwirya sabwina nigwia mwagi'nya'na myawi'dinna! Nawi'nyabwi yawi'di nayaa ja! Yuyagaa' nayaa pada'galayawi'di nebulyabwina jiwirya! <sup>8</sup>Yagaala maamidarya yavada'galya'ne! a'mwera yiwetawakya majidaya'ne! nayaa duthatheiginyi. “Nemire yikamaangera neminyi kayaakyagaala aane piri' kiri' nedipinevina ‘O, yiwetawakya aane piri' kiri' mwari. We! Simunya' neyeki'mwaka!’ yawipika!” dadi sara duthatheiginyi.

<sup>9</sup>Kiraazitiyarera yaasiwa'wawinyaraavi widaayadivisaraavi gimi nayaa dara duthana! Yuyangine'na kunnya maremwaalyaraavi dalaangewi mwaabika! Sahwara kunnya maremwaalyaraavina tewaanya wivu'nivanike wawinya dala pininnanya tewaanya nayaa yipika! Yagaala kayaa'nanya kunnya maremwaalyaraavi ayina naja'nawidipika!  
<sup>10</sup>Sahwaraavire gilyivita pimili' kimili' yuina numaaipika! Aawa. Kumire yagaalya limwaga'divi' kunnya yida'nanyabwi wibwaridaakupika! "A'mwera yiwaala yiwannadivitabaabi' nemire wawinyavina Gotiyai nevadaihasamaa'derine yagaala wijiwirinike' savine yaya naange' a'mwera munyaba makibika!" dapiri nayaa sara yipika!

<sup>11</sup>Sare' dare'nesi. Gotiyare yanga gaimwange' a'mwe yuyaraavi yiniga wi'na padaihasamaaranne' ku'maayabanna mena neyima'naabakesi. Yi Kiraazitiyai baka nawi'nyina yakesi. <sup>12</sup>Gotiyare yanga daza' Gotiyarina bule'na wijaaya saburiji Kwaakevakiya yuya simunya kayaa'nanya saburiji makwasakaade'na wijiwirya neyivani'. "Dahaasavi nemi simunya nayaa yawi'na yadaa yida'maraangeburi nayaa yamaryadaa Gotiyarina nayaa yavada'galayawi'na yadaa mwalaana!" dawaaji wijiwirya sa' midinaade'nanyi. <sup>13</sup>Nemi sara mwidaa yilaaya yadaa tewaanaanga yinike' diraginna limwadaa yemwaaimanigo. Yi, Gotiya Naangei nemire nevadaihasamaa'dei Kiraazitiyai Jizaazarina yemwidaa "Sahwai Sigunyaviya byaanna diraginyasi ku'maayabanna yima'naabathelyi," yawi'daa yemwaaiholyira. <sup>14</sup>Sahwai neminyi gamire gaalyabwi yagalya'mavakelyi. Neminyina "Ayahi mubya yamaarya'neinyi kiwinya dinika galazekivala yuya sangina wivadaihasamaarima! Aalya ya'muji girika duimwagasi'na'muji niminyine'na nimore tewaanyara wimwaaihiwijara nimore yunera mwaabika!" daka gamire gaalyabwi yagalya'ma'na. Sare' wawinya diraginna yadivi' yuya tewaanyabwina yipika!

<sup>15</sup>Yuyagaa' yagaala daza a'mweraavi duziwaakya! Yagaala daza midibi'de'na gimi dihaa'bwata ja! Sara yadi gimi maanga diraginna widadi Naangere diraginya' maara'gizi mamidinyadivisaraavirebwi dirivipalasila! A'mwe aane pwai kwai giminyina "A'mwe yaasiwakelyira," nagyawiradika! Aawa. Naangere diraginyavi kuna ja!

### **Tewaanyabwina nemi diraginna daaya'nebwinesi.**

**3** <sup>1</sup>Gimi a'mweraavire simunyai kuna diha'bwarimwaihya jitheiginyi. Yi ga'maanijaraji a'mwe maremwaaidivisaraji saraavi dalaangewi mwaabika! Sahwaraavire yagaalya nayaa midibi'derera. Wawinya yuya sa tewaanya ya'na tavaravana mwaabi'derera. <sup>2</sup>A'mwe aane pwai kwari biraiyagaala nudipidika! Mala narannipika! Pwara kuminyi kayaa'na kyapiji bwiwanga yabwi yipi'dere. Yuyaraavi kwaamu'nanya yuyabwi wipika! <sup>3</sup>Sare' yuyainaavine darevinyi. Sinnawi nabaai nemi kwainaji

simunya nawi'nya kininnaka maayaine. Nemi yagaalya galazekivaina yadaanyaina, Saataani Kayaa'nanyai kwaasiyabwina nedadaa'nyi yiraataate yamaryagoine. Nemi yaasiwa'wawinya yadaa munyi' dikaata ya'ne dala pininnanyangiji wabahilaaka ya'ne dala pininnanyangiji mwaaloina. Kayaa'nanyaburiji tiganaaryaburiji yamaryoina. A'mwera neminyina similika wimwaalakeina, nabaai nemi kwainaavinaji similika wimwaalakeine. <sup>4</sup>Kiri' Gotiyai nemire nevadaihasamaa'dei a'mweinaavi tewaanya nayaa bwiwanna neyaka yanga naange'na neyivanikelyi. Sahwari a'mweinaavina tewaanya wivu'nadelyi. Yi sasare sabwi ku'maayabanna yima'naabakebulyi. <sup>5</sup>Sahwai nevadaihasamaarakelyi. Dare'na mi'. Nemi yuna yida'maraanga yadaanya sabwina yawi'dana mi'. Aawa. Gamire neminyina kale gaimwange'na sa'na nevadaihasamaarakelyi. Kurya Tewaanyai neminyi aalya neyakeine. Yi aalya ya sabwi neyake' nawi'nya mudikeinaavi nemwaaihada nemire simunyaviji kuryariji mudikewaari wimwaaihakelyi. Kurya Tewaanyai gaala mudikebwi nejaavakelyi. Sarevi Gotiyai nevadaihasamaarakelyi. <sup>6</sup>Jizaazai Kiraazitiyai nemire nevadaihasamaa'dei yakevi Gotiyai Kurya Tewaanyari yanga naange'na naanna newakakelyi. <sup>7</sup>Sai gamire yanga gaimwangevina neminyina "A'mwe yida'maraangere. Nimirerera," nedakevi "Gaala yuyagaa' yuyagaa' mwaalya'ne daza' yemwaaibi'dera Kuvinimaangeinyire yuya'na maarya'nera yima'nipika!" daka sara nemwaaihakelyi. Sare'na naanna nejaavakelyi. <sup>8</sup>Yagaala daza' limwagasa'ne' naanga nebulyasi.

Nimire simunyavi giminyina dara yawi'manige. Dazahiningina gimi diraginna duthana! Sarevi nabaai a'mwe Gotiyari mena wi'nalimwagesaraavina "Kumire simunyangi wawinya tewaanya diraginna ya'nengi wakinipika! Tewaanya saburina diraginna daapika!" da'gizi sara duthana! Dazahini nawi'nya yaka a'mweraavi gaimwadengi. <sup>9</sup>Kiri' dala pininnanya yagaala simumaaya pinabisa yaasiwa' yidaanganyaji Ne sinnawinyaraavine yayaji maanga dinyaji Mozizare Kiwinya dinikenna maihuri'nyiyagaala bathiwiaji sasare dazangi davila'deiginyira. Sare' darevinyi. Daza waryaanyangira. Daza kune neminyi yiniga wi'na negaimwagathe mi'. <sup>10</sup>Gotiyare yi'bwa'nawi'nadivisaraavi jaapalawimwaaihya'nere simunyai nayaa javada'gala! Gave pigaa'na "Gimirebwina mala nayaa jiwanna!" wida'gizi ayina sara yaja' pigasaai "Mala nayaa jiwanna!" duthatheiginyira. Nabaai sai kadika mu'nyi kyoji sarina bule'na duzaadelyi. <sup>11</sup>Gimi dara jawika! A'mwe sasarei tuta nawi'nya' mena yagalya'mavaka gannya kayaa'nanya yadevwi gami sari jida'nya'nelyi.

### Yagaala aayannesi.

<sup>12</sup>Divi nabaai nimi Aatemazai pwari Tikikaazai kwari giminyawinna kadarmayaasa'muji gimi Nikopolizina niminyawinna yime'nya'bi'

divadeiginyi. Sare' darevinyi. Nimi mena diweinyi. Aalyavi yihuta naangedaa'na anga Nikopolizi mwaalideinyira. <sup>13</sup>Sinaazai kiwinyangina sidu'nakelyi Aapolizalyi saraari tusavine gaimwange'na yime'nya'bi'na nayaa dumakwodeiginyi. “Yi saraari gilyivita kaanya yamarikade aane piri' kiri' numudaasadika!” da'gizi dihaimwadeiginyi. <sup>14</sup>Nabaai nemire a'mwera diraginna daaya'na a'mwe gilyivisanna diraginna wimudaasivanikeraavi tewaanya gaimwange'na simunya nayaa yawiramaapika! “Sahwara yaasiwa'na mwaaibiza' Gotiyare saburine nawi'nya mima'naabi naneyadika!” dapiji sara yawiramaapika!

<sup>15</sup>Nimiji nye'mwannemwaaihata a'mwe yuyara giminyina “Neya'mweigi!” githasiwaabaa!. Kiraazitiyari limwangeburi neminyina tewaanya wivu'naderaavi “Neya'mweihi!” duthana!

Yanga gaimwange' sarimi yuyahiriji kuna yihye'mwannamwaalana!

*Poli*